

Inuusuttut ilinniarfiini, inuussutissarsiutinut ilinniarfinni ilinniarfinnilu ingerlaqqiffiusuni ilinniartut karakterimik qaffassarnissaannut misilitseqqissinnaalersinniarlugit malittarisassiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartuni ilaasortaq Nivi Olsen, Demokraatit)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortaq Nivi Olsen, Demokraatit, siunnersuummut qutsavigerusuppara.

Aallarniutigalugu oqaatigineqassaaq misilitseqqinneq nalinginnaasumik tassaavoq ilinniartup misilitsinnermi angusinnginnera taamaattumillu misilitseqqittariaqarnera.

Siunnersuummili ilinniartup misilitsinnerminik angusisimanagera pineqarpoq. Ilinniartup taamaalilluni takutereerpaa fagimut piumasaqaatit pingaarnerpaat artorsaatiginnikkai kisiannili taamaakkaluortoq pitsaanagerusumik angusaqarsimasinnaagaluarluni. Aamma naak pisuni taama ittuni misilitsinneq nutaaq pitsaanagerusumik karaktereqalernissamut qulakkeerinninngikkaluortoq kiisalu misilitsinnermi nutaami taamaalillunilu fagimik angusinnginnissamut aarlerinartortaqaraluortoq.

Atuartumut/ilinniartumut fagimik angusisimasumut misilitseqqinnissamik neqeroortoqartassapat saniatigut naleqqutinngitsoqassaaq.

Misilitseqqinnissamut tamanut neqeroortarnikkut ataasiakkaat misilitsinnermi pitsaanagerpaamik takutitsinnginnerannik kinguneqarsinnaavoq, tassami misilitsinnerup uteqqinnissaanut periarfissaqartuaannartussaassamat. Tassunga eqqaaneqareersutut ilaapput misilitsinnermik angusiffiugaluartumik angusinngitsoornissamut periarfissaq.

Atuartut angusereersimasut misilitseqqittarnerat suliffeqarfimmut atorfissaqartinneqarfimminnut isernissaannik kinguarsaataassaaq. Suliffeqarfeqarfimmilu ilinniarsimasortatsinnik tamanik sakkortuumik atorfissaqartitsiffiusumi atorfimmik ujarlernerminni karakterit ataasiakkaat apeqqutaanngillat annikitsuaqqamilluunniit apeqqutaasarlutik. Pingaarneq tassaavoq fagip angusiffigisimanissaa. Inuussutissarsiummut misilittagaqarneq inuttullu qanoq ittuuneq amerlanertigut pingaaruteqarnerusarput.

Kiisalu ilinniarfeqarfiit atuartunik aammaarlutik isumaginnittalerunik ilinniarfeqarfinni tamani isumalluutinik atuinernermik kinguneqassaaq. Atuartitsissutitigut allaffissornikkullu, minnerunngitsumillu censorip atuartitsisullu misilitseqqinnermut piffissamik piareersarfiusumik atuinissaat.

Naalakkersuisulli siunnersuuteqartoq misilitsinnerit amerlasuunut unammillernartuusarneranik kissaatigisatullu qaffasissumik karaktereqannginnerup pakatsinarsinnaaneraniq oqariartorneranik isumaqatigaat.

Ilinniartunut misilitsinnissamut ernumasartunut pissangasernerup coachimit tarnilluunniit pissusaanik ilisimasalimmit sulissutiginnissaa periarfissaavoq. AQQUT – Nuna tamakkerlugu Iltersuisarfik - ernumasarnermut misilitsinnissamullu annilaangasarnermut assigiinngitsunik arlalinnik neqerooruteqarpoq.

Misilitsinnermut ernumagaluarluni atuartitsisoq censorilu misilitsittut ernumasut amerlanertigut misilittagaqarfigilluartarpaat, atuarsimasassallu misilitsittumit paasineqarsimanersut malugisinnaasarlugit.

Kalaallit Nunaanni inuussutissarsiutinut ingerlaqqiffiusumilluunniit ilinniartinnut ataatsimut agguaqatigiissillugu karakterissatut piumasaqaammik aalajangersaasoqarnikuunngilaq. Aallaaviatigut karakterissatut piumasaqaataajunnartut danskisuunngikkunik tuluttoortarput, atuartitsinerit atuartitsissutillu ilaanni oqaatsit taakku atornerqartaramik. Taamaattumik tigusaanissamut piumasaqaatit atuartut fagini ilinniartinnilu taakkunani pisariaqarfiatigut oqaatsinut pisarialinnut sapinnginnissaat qulakkeerniarlugit aalajangersagaasarput.

Ilinniartinnut amerlanngitsunut qaffasinnerusumik ilinniarnissamut tunngatillugu aalajangersimasumik karaktereqarnissamut piumasaqaateqarfiusinnaasunut e-GUX-imi fagimik naammaqutissamik faginilluunniit ataasiakkaanik toqqaanissamut periarfissaqassaaq. Ilinniakkami ingerlaqqiffiusumi ilinnialernissamut piumasaqaatit naammassinissaannut atuartinneqarsinnaallutillu piginnaanngorsarsinnaapput.

Taamaalilluni maannakkut tunngaviusut eqqarsaatigalugit fagini angusiffigineqarsimasuni misilitseqqinnissamut neqerooruteqarnissamut suut piviusorsiorlumik tunngavilersuutaasinnaanersut takujuminaapput.

Tamatuma saniatigut Kalaallit Nunaanni Ilinniartitaanermut Siunnersuisoqatigiit pilersinneqareerunik tassunga tunngasumik misissuinissamut piumaffigineqarumaartut ilisimatitsissutigineqarsinnaavoq. Pitsaanerusumik karaktereqalerniarluni misilitseqqinnissamut periarfissamik neqeroortarnissamut pisariaqartitsinerup nalilersornissaa misissuinermi tassani siunertaassaaq. Paasissutissiissutigissavarput Kalaallit Nunaanni Ilinniartitaanermut Siunnersuisoqatigiinnut innersuussisinnaatitaasunut qaaqussutitnik nassiussisoqarnikummat siunnersuisoqatigiillu ukioq nikitsinnagu toqqarneqarnissaat ivertinneqarnissaallu naatsorsuutigineqarpoq.

Taamaattumik tamanna tunngavigalugu Naalakkersuisut matumuuna allannguutissatut imatut siunnersuuteqarput:

"Kalaallit Nunaanni Ilinniartitaanermut Siunnersuisoqatigiit malittarisassanik, siuliani aarlerinartut eqqartorneqartut eqqarsaatigalugit inuusuttunut ilinniartinni, inuussutissarsiutinut ilinniartinni ingerlaqqiffiusumillu ilinniartinni ilinniartut karakteritik pitsanngorsarniarlugit misilitseqqinnissaannut periarfissiisunik pisariaqartitsisoqarnersoq pillugu nalilersuinissaannik innersuussuteqassappatalu innersuussuteqarnissaannik piumaffiginissaannut Naalakkersuisut peqquneqarnissaat pillugu Inatsisartut aalajangiiffigisassaattut siunnersuut".